


U ovom broju, između ostalog, čitajte:

- **Održane sjednice upravnih odbora UPFBiH i UPKS**
- **Potpisan Kolektivni ugovor za djelatnost tekstila, kožarsko-prerađivačke, gumarske i industrije obuće u FBiH**
- **Održane izborne skupštine grupacija poslodavaca ZDK i USK pri UPFBiH**
- **Skupština Grupacije poslodavaca SBK pri Udruženju poslodavaca u FBiH održala sjednicu**
- **Sastanak predstavnika UPFBiH i Direkcije za europske integracije**
- **UPFBiH učestvovalo na Sajamu zapošljavanja "Gledaj sebi posla"**

Održana sjednica Upravnog odbora Udruženja poslodavaca u FBiH



Na sjednici Upravnog odbora UPFBiH, održanoj 21. oktobra 2025. godine članovi su, nakon usvajanja zapisnika sa I konstituirajuće i II sjednice UO raspravljali o aktuelnim zakonima od interesa za poslodavce i definisanju prioriteta. Predsjednik UPFBiH Nihad Imširović i direktor Mario Nenadić naglasili su, između ostalog, prioritet na donošenju fiskalnih zakona, odnosno Zakonu o fiskalizaciji transakcija i Zakonu o doprinosima te da se, prema najavama iz Vlade FBiH, očekuje uskoro upućivanje Zakona o fiskalizaciji transakcija u zakonodavnu proceduru, a potom i donošenje propisa o doprinosima sa konačnim ciljem da se doprinosi smanje što bi za poslodavce predstavljalo održivije i dugo očekivano rješenje ka poboljšanju poslovnog okruženja. Drugi set zakona odnosi se na radno-pravno zakonodavstvo, odnosno na Zakon o radu, Zakon o posredovanju u zapošljavanju i Zakon o zapošljavanju stranaca. Naglašeno je da je radna grupa UPFBiH radila na komentarima na Zakon o radu te da je pripremila sveobuhvatan materijal koji je dostavljen resornom ministarstvu. Očekuje se da većina komentara UPFBiH budu uvažena u konačnom tekstu Zakona. U pripremi je i sjednica ESV-a na kojoj se očekuje, u skladu sa zaključcima sa ranijih sjednica, prezentacija izmjena Zakona o zdravstvenom osiguranju. Cilj zakona bi bio smanjenje troškova-broja dana bolovanja na teret poslodavaca. Članovi UO informisani su i o trenutnom statusu propisa iz oblasti trgovine, odnosno Zakona o unutrašnjoj trgovini, Zakona o zaštiti potrošača i Zakona o kontroli cijena.

Direktor UPFBiH Mario Nenadić u nastavku sjednice je predstavio informaciju i o granskim kolektivnim ugovorima. Kazao je da je Udruženje tokom ove godine sa reprezentativnim sindikatima potpisalo četiri kolektivna ugovora i to za djelatnost drvne i papirne industrije,

tekstilne, kožarsko-prerađivačke, gumarske i industrije obuće, proizvodnje i prerade metala kao i za oblast cestovnog prometa. Novi kolektivni ugovori čije potpisivanje još uvijek nije pokrenuto odnose se na djelatnosti građevine, trgovine i hemije i nemetala. Istakao je da je nakon potpisivanja Kolektivnog ugovora za djelatnost proizvodnje i prerade metala nastao problem u vezi sa njegovom primjenom na kompanije u većinskom vlasništvu Vlade FBiH te da socijalni partneri na inicijativu Vlade FBiH razmatraju modalitete rješavanja. Ovlašten je pregovarački tim da nastavi pregovore sa Sindikatom metalaca FBiH uz uključenje Vlade FBiH.

Predsjednik UPFBiH Nihad Imširović predstavio je Upravnom odboru plan terenskih obilazaka s ciljem unapređenja komunikacije i rada kantonalnih grupacija i neophodnih izbornih procesa upravljačkih tijela po kantonima. S tim u vezi, najavljeni su sastanci u ZDK, USK, SBK, a potom i HNK i ZHK. Članovi UO su usvojili plan obilazaka.

Članovi su raspravljali i o donošenju Odluka o imenovanju/reimenovanju Pravnog i Ekonomskog savjeta UPFBiH te je zaključeno da će predsjednik i direktor predložiti nove članove ovih tijela.

Na sjednici je direktor Nenadić upoznao članove o pripremi završne konferenciju na temu „Ekonomске reforme i industrijska perspektiva: izazovi i prilike bh. privrede u 2026. godini“ koja ima za cilj otvaranje dijaloga o ključnim ekonomskim reformama, industrijskim trendovima i prilikama koje očekuju bh. privredu, a na kojoj bi učestvovali privrednici, predstavnici institucija, sindikata, akademske zajednice, kao i predstavnici međunarodnih i domaćih organizacija. Konferencija će se održati 13.11.2025. godine u Sarajevu. Članovi Upravnog odbora su podržali ovu inicijativu.

Također, članovima je predstavljen i izvještaj o novim članicama UPFBiH, kao i plan aktivnosti i inicijative za širenje članstva po kantonima i granama. Članovi UO su pohvalili kvalitetan rad UPFBiH i podržali najavljene aktivnosti na omasovljavanje članstva. Pod tačkom "Razno", predstavnici grane tekstila izložili su probleme koje opterećuju ovu industriju. Povećani su troškovi rada, primijećen pad produktivnosti radne snage, povećan broj bolovanja kao i nemogućnost povećanja prodajnih cijena. Članovi su sa razumijevanjem prihvatili informaciju o problemima u tekstilnoj industriji i naglasili da slični problemi guše i druge grane industrija u FBiH te ih čine nekonkurentnim na domaćem i EU tržištu, što će se prema procjenama dodatno pogoršati početkom iduće godine odnosno početkom primjene CBAM politika-karbonske takse, novih politika u oblasti boravka naših radnika u inostranstvu, digitalizacije i drugo. Predloženo je da Udruženje organizuje tematsku sjednicu sa predstavnicima vlasti s ciljem analize trenutne situacije i pronalaženja održivih rješenja za postojeće i buduće izazove u bh. privredi.

Upravni odbor UPKS održao XIII redovnu sjednicu



Upravni odbor Udruženja poslodavaca Kantona Sarajevo održao je 22. oktobra 2025. godine XIII redovnu sjednicu na kojoj su razmatrane ključne aktivnosti Udruženja i praćenje realizacije zaključaka sa sastanka s predstavnicima vlasti Kantona Sarajevo.

Posebna pažnja posvećena je zakonima i drugim propisima koji su trenutno u proceduri donošenja ili izmjena, a koji imaju značajan uticaj na poslovno okruženje u Kantonu Sarajevo.

Predstavnici Udruženja izvijestili su da je Nacrt zakona o podršci ulaganjima od strateškog značaja za privredu Kantona Sarajevo u fazi javne rasprave koja traje 60 dana, te da je Nacrt zakona o izmjenama i dopunama Zakona o turizmu u KS prošao ovu proceduru i da se čeka utvrđivanje na Vladi KS i upućivanje u daljnju proceduru. Ovaj zakon ima za cilj unapređenje turizma u KS kao strateške grane i zaštite korisnike turističkih usluga i profesionalizaciju turističke djelatnosti, a iz perspektive privrednika i obrtnika svakako je cilj i suzbijanje sive ekonomije.

Članovi radne grupe UPKS za izradu Zakona o posredovanju u zapošljavanju i socijalnoj sigurnosti nezaposlenih osoba istakli su da je rad radne grupe obustavljen i da radna grupa nije do kraja dovela svoj rad te je zaključeno da se od resornog ministarstva zatraži informacija o trenutnom statusu radne grupe i planiranih aktivnosti u vezi sa pripremom ovog zakona.

Kada je riječ o Zakonu o koncesijama Kantona Sarajevo, konstatovano je da nakon više urgencija koje je Udruženja poslodavaca KS dostavilo premijeru i ministru još uvijek nisu ispoštovani zaključci sa zajedničkog sastanka kod premijera Vlad KS kad je dogovoreno da će se iz režima koncesije u KS izuzele solarne elektrane na privatnim objektima i zemljištu, ako se ne koristi javno dobro i ako se energija koristi za vlastite potrebe. Zaključeno je da će UPKS u narednom periodu uputiti urgenciju za upućivanje u proceduru ovih zakonskih izmjena Vladi i Skupštini KS.



Također je razgovarano i o Nacrtu zakona o dualnom obrazovanju Kantona Sarajevo, koji je Vlada KS utvrdila 16. oktobra 2025. godine i uputila u skupštinsku proceduru. Udruženje je ponovo ukazalo na potrebu da se Udruženje poslodavaca kroz zakonska rješenja posebno u oblasti učenja

uz rad, praktične nastave i drugo uključi kao kao ključni partner u procesu obrazovanja, te da se uspostavi jasna i formalna saradnja između poslovne zajednice i obrazovnih institucija. U suprotnom, prema domaćem i međunarodnom zakonodavstvu i praksi stvorit će se dodatni raskol između učenja i praktične nastave. Zaključeno je da UPKS uputi urgenciju za uvrštavanje ovih izmjena u nacrt zakona već u ovoj fazi, a svakako tokom procedure u Skupštini KS.

Članovi Upravnog odbora upoznali su se i s aktivnostima na izradi Prijedloga zakona o izmjenama i dopunama Zakona o komunalnoj čistoći, kojim se precizira definisanje obaveznika plaćanja, osnovice obračuna i pravila u slučaju trajnog i sezonskog nekorištenje objekata. Zbog važnosti ovog pitanja UPKS zatražit će sastanak kod resornog ministra s ciljem pojašnjenja zakonskih rješenja i rješenja u kontekstu izmjene Pravilnika o metodologiji/kalkulaciji cijena komunalnih usluga u dijelu koji se odnosi na obračun cijena.

Direktor UPFBiH Mario Nenadić je informisao članove UO UPKS o prioritnim aktivnostima Udruženja poslodavaca u FBiH i Ekonomsko-socijalnog vijeća FBiH do kraja godine, kao i prioritnim zakonima za unapređenje poslovnog okruženja. Tom prilikom naglasio je očekivanja u smislu pripreme Zakona o fiskalizaciji finansijskih transakcija, Zakona o doprinosima te seta radno-pravnih propisa odnosno Zakona o radu, Zakona o posredovanju u

zapošljavanju i socijalnoj sigurnosti nezaposlenih osoba i Zakona o zapošljavanju stranaca kao i Zakona o zdravstvenom osiguranju i zakona iz oblasti trgovine. Članovi su primili k znanju ovu informaciju.

Predsjednik UPKS Suad Ećo upoznao je prisutne sa inicijativom o pripremi tematske sjednice Službe za zapošljavanje KS, Kantonalne uprave za inspekcijske poslove i UPKS koja bi bila održana s ciljem sagledavanja ukupnog stanja i perspektiva na tržištu rada, nezaposlenih osoba i programa zapošljavanja. UPKS će pripremiti materijal za ovu tematsku sjednicu čije održavanje podržavaju članovi Upravnog odbora.

Upravni odbor i dalje smatra da na planu poboljšanja poslovnog okruženja u KS nije urađeno koliko se može i očekuje i stavlja na raspolaganje svoje kapacitete da se u narednom periodu situacija poboljša i unaprijedi.

Održana VII redovna izborna sjednica Skupštine Grupacije poslodavaca ZDK pri UPFBiH



Grupacija poslodavaca Zeničko-dobojskog kantona pri Udruženju poslodavaca u FBiH održala je VII redovnu izbornu sjednicu Skupštine 23. oktobra 2025. godine u kompaniji TRGOŠPED d.o.o. Kakanj.

Na sjednici su učestvovali predstavnici brojnih privrednih subjekata s područja Zeničko-

dobrojskog kantona, članovi Grupacije, načelnik Općine Kakanj Mirnes Bajtarević te gosti iz Udruženja poslodavaca u FBiH.

Prije radnog dijela Skupštine, predsjednik



Udruženja poslodavaca u FBiH Nihad Imširović pozdravio je skup, upoznao članove o aktivnostima UPFBiH kao i prioritetima u narednom period. Istekao je da su pokrenuti, a još uvijek nerealizovani prioriteti fiskalne reforme, reforme radno-pravnog zakonodavstva kao i propisi iz oblasti trgovine

i zdravstvenog osiguranja. Pozvao je poslodavce širom FBiH na uključivanje u Udruženje s ciljem objedinjavanja interesa i usaglašenog djelovanja prema drugim socijalnim partnerima.

Skupština je razmatrala i jednoglasno usvojila Izvještaj o radu Grupacije za period septembar 2022. – septembar 2025. godine kao i Program rada Grupacije za period 2025–2027., kojim su definisani glavni ciljevi i prioriteti u narednom trogodišnjem razdoblju.

U izbornom dijelu sjednice izvršeni su izbori u organe Grupacije. Za predsjednika Skupštine Grupacije poslodavca ZDK pri UPFBiH imenovan je Semir Kantić iz kompanije SSAMplast d.o.o. Tešanjan a za potpredsjednika Kenan Handžić iz kompanije Teve Varnost Elektronika d.o.o. Visoko.

Za predsjednika Grupacije izabran je Nagib Mujkić, direktor Tisakomerc d.o.o., dok su za zamjenike predsjednika izabrani Ibrahim Meškić, Minextrade d.o.o. Zenica i Alma Zaimović, Trgošped d.o.o. Kakanj. Za članove Upravnog odbora imenovani su:

- Melisa Amidžić, Heidelberg cement materials BH d.o.o. Kakanj;
- Vladimir Franjić, Meridian d.o.o. Zenica;
- Rasim Memagić, Alma Ras d.o.o. Olovo;
- Edita Mulić, Natron Hayat d.o.o. Maglaj;
- Himzo Smajić, Pobjeda d.d. Tešanj;
- Senad Pajić, New nomad, Zenica;
- Ismet Begić, Almy d.o.o. Zenica;
- Edin Badnjar, Badnjar d.o.o. Žepče;
- Kerim Kahriman, Poljo-teka d.o.o. Žepče;
- Selma Starčević, HAS SA d.o.o. Zavidovići;
- Majda Mujanović, Stomatološka ordinacija Mujanović, Žepče;
- Sead Kovačević, GST Bosnia d.o.o. Maglaj;
- Ajla Babić, Biss-tours Zenica i
- Admir Čaluk, Sim-komerc d.o.o. Kakanj.

„Zahvaljujem članovima Grupacije na ukazanom povjerenju. Ovo je zaista važna i odgovorna funkcija. Naš zajednički cilj ostaje stvaranje boljeg poslovnog okruženja i jačanje saradnje s institucijama vlasti. Samo kroz dijalog i zajedničko djelovanje možemo osigurati stabilan rast i razvoj privrede Zeničko-dobojskog kantona”, kazao je Mujkić.



Za članove delegacije poslodavaca u Ekonomsko-socijalnom vijeću ZDK imenovani su Nagib Mujkić, Ibrahim Meškić, Melisa Amidžić, Edita Mulić i Vladimir Franjić, a za zamjenske članove imenovani su Himzo Smajić, Alma Zaimović, Sead Kovačević, Fuad Kaknjo i Ismet Begić.

Tokom sjednice predstavljen je I izvještaj koji je pripremljen u okviru projektu Jačanje zaštite ljudskih prava u aktivnostima poslovnog sektora BiH koju realizuje Udruženje poslodavaca u FBiH i Udruženje poslodavaca RS-a, a uz finansijsku podršku Europske unije koji ima za cilj doprinijet zaštiti ljudskih prava u Bosni i Hercegovini promocijom provedbe Smjernica Ujedinjenih naroda o poslovanju i ljudskim pravima unutar poslovnog sektora u BiH.

Poslodavci su pokazali veliki interes za ovaj projekat te naglasili važnost ovakvih i sličnih projekata u smislu jačanja i izgradnje odgovornih kompanija.

Na kraju sjednice učesnici su istakli važnost nastavka partnerskog dijaloga između poslodavaca, sindikata i vlasti, s ciljem unapređenja poslovnog ambijenta, jačanja konkurentnosti privrede i otvaranja novih radnih mjesta u Zeničko-dobojskom kantonu.

Održana III redovna izborna sjednica Skupštine Grupacije poslodavaca Unsko- sanskog kantona pri Udruženju poslodavaca u FBiH



Grupacija poslodavaca Unsko-sanskog kantona, koja djeluje u okviru Udruženja poslodavaca u Federaciji BiH, održala je III redovnu izbornu sjednicu Skupštine 28. oktobra 2025. godine u Bijaću.

Na sjednici su prisustvovali brojni privrednici s područja USK, koji su razmatrali ključne aktivnosti Grupacije u proteklom petogodišnjem periodu, te definisali programske aktivnosti za naredne godine. Sjednici su također prisustvovali predsjednik UPFBiH Nihad Imširović, direktor UPFBiH Mario Nenadić, prethodnih predsjednik i član ESV-a FBiH Adnan Smailbegović kao i predsjedavajući Skupštine USK Nisvet Jusić, premijer Vlade USK Mustafa Ružnić, gradonačelnik Bijaća Elvedin Sedić, ministrica pravosuđa i uprave Sanela Zećirević, ministar finansija Danko Jakšić, ministar građenja i poslovnog okruženja Edvin Odobašić i sekretar Ministarstva privrede Damir Redžić.



„Vrlo je važno da gradimo partnerski odnos, a godinama ga gradimo u kontinuitetu sa privrednicima kako bismo zajedno kreirali privredni ambijent. Mi kao Vlada smo opredijeljeni da vrlo brzo usvojimo Zakon o poticanju male privrede koji će omogućiti da jedan dio Budžeta svake

godine odvojimo za podršku privredi putem raznih programa i mjera. U našim kapacitetima, pokušat ćemo da realizujemo sve što dogovorimo s vama privrednicima" kazao je predsjedavajući Skupštine USK Nisvet Jusić.

Premijer Vlade USK Mustafa Ružnić kazao je da privrednici uvijek imaju otvorena vrata za razgovor.

"Nema suprotstavljenih strana, treba da saradujemo i zato smo prije nekoliko godina formirali Biznis klub da vidimo šta biznis sektor očekuje od vlasti te da kroz dijalog dođemo do konkretnih rješenja. Važno je da imamo kontinuirani dijalog", kazao je Ružnić.

Predsjednik UPFBiH Nihad Imširović posebno se zahvalio predstavnicima vlasti koji su podržali ovaj skup čime su dali svoji doprinos aktivnostima i radu Grupacije i Udruženja poslodavaca.

„Ključni interes svih nas je da gradimo kvalitetan ekonomski ambijent i osiguramo uslove da realni sektor ostvaruje svoje ciljeve, a da zaposlenici budu



zadovoljni", istakao je Imširović.



mandat od četiri godine.

Članovi Skupštine usvojili su Izvještaj o radu Grupacije za period 2020–2025. godine, kao i Program rada i prioritetne aktivnosti za period 2025–2027. godine, a u izbornom dijelu sjednice, za novog predsjednika Skupštine imenovan je Nedžad Čavkanović iz kompanije Čavkunović Bau, na

Za novog predsjednika Upravnog odbora imenovan je Nedžad Mezildžić iz kompanije Kolmix, a za potpredsjednika Munib Čatić iz MC Stela.

Za članove Upravnog odbora imenovani su:

- Esad Hajdarević, Schema
- Elvis Horozović, PVC Stolarija Horozović
- Aida Fojnica, Krupa Kabine
- Nedžad Mezildžić, Kolmix
- Jadranka Penava, Meggle Mljekar
- Sandi Terzić, Pirnar
- Dževad Civić, Civić
- Safet Kovačević, Kovgrad
- Samir Zahirović, Bihaćka pivara

Za članove delegacije poslodavaca u Ekonomsko-socijalnom vijeću USK imenovani su Haris Ćoralić iz Opal Grupa, Jadranka Penava iz kompanije Meggle i Armin Kardašević iz kompanije Safe road, a za zamjenike Samir Zahirović iz Bihaćke pivovare, Aida Fojnica iz kompanije Krupa kabine te Dževad Civić iz kompanije Civić.

U okviru sjednice predstavljene su i aktivnosti na projektu „Radimo zajedno”, te održana



edukacija na temu „Javna promocija izvještaja o procjeni implementacije UNGPBHR i EU CRS u BiH“, kojom je istaknuta važnost održivog poslovanja i društvene odgovornosti sa posebnim akcentom na jačanje zaštite ljudskih prava u aktivnostima biznis sektora, a što se

trenutno implementira kroz Projekat koji provode UPFBiH i UPRS uz finansijsku podršku Europske unije.

„Pitanja ljudskih prava su generalno i pitanja prava na život, zdravlje, imovinu i dr. U poslovnom okruženju u FBiH, ljudska prava još uvijek nisu obuhvaćena na dovoljan i pro-europski način i zato imamo projekat koji promoviraju sve što podrazumijeva ljudska prava sa posebnim aspektom na prava i radnika i poslodavaca u poslovnom okruženju. Danas smo imali priliku da ova važna pitanja promoviramo i naglasimo važnost ljudskih prava kao standarda poslovanja u europskoj praksi. Kako su sjednici prisustvovali predstavnici vlasti, članovi Skupštine, Upravnog odbora, Ekonomsko-socijalnog vijeća Grupacije poslodavaca USK pri UPFBiH, otvorenom diskusijom smo sigurno proširili svijest o ovoj važnoj temi vezano za procese koje nam predstoje kada su u pitanju procesi formalnih europskih integracija, ali i jačanja neformalnih EU integracija kroz ostvarivanje i zaštitu ljudskih prava u praksi, neovisno od formalnih procesa i procedura“, kazao je direktor UPFBiH Mario Nenadić.

Nakon sjednice, novi predsjednik Grupacije Nedžad Mezilidžić zahvalio se na ukazanom povjerenju za imenovanje na ovu važnu funkciju.

„Nastavit ćemo sa aktivnostima koje je do sada obavljala Grupacija u saradnji sa Udruženjem poslodavaca u FBiH, kako bi smo kroz zajedničku saradnju, a radeći sa predstavnicima vlasti i sindikata kao socijalnih partnera, osigurali prosperitetan razvoj realnog sektora, pa time i društva u cjelini. Na ovom planu Grupacija pokazuje da su poslodavci u Unsko-sanskom kantonu aktivan socijalni partner u kreiranju boljih uslova za poslovanje i zapošljavanje“, kazao je Mezilidžić.

Potpisan Kolektivni ugovor za djelatnost tekstila, kožarsko-prerađivačke, gumarske i industrije obuće u FBiH



Udruženje poslodavaca u FBiH / Grupacija poslodavaca za djelatnost tekstila, kože i obuće FBiH i Sindikat tekstila, kože, obuće i gume, potpisali su 14. oktobra 2025. godine Kolektivni ugovor za djelatnost tekstila, kožarsko-prerađivačke, gumarske i industrije obuće u FBiH.

Ovaj ugovor rezultat je kontinuiranog socijalnog dijaloga, međusobnog uvažavanja i zajedničkog nastojanja socijalnih partnera da unaprijede uslove rada i očuvaju stabilnost privredne grane koja zapošljava značajan broj radnika u Federaciji BiH.

Novim kolektivnim ugovorom utvrđena je najniža neto satnica od 5,73 KM do 6,00 KM, a u odnosu na prethodni ugovor uvećan je iznos otpremnine u iznosu od dvije prosječne plaće kao i utvrđena povoljnija naknada za topli obrok radnicima u iznosu od 0,3 do 1 posto prosječne plaće ostvarene u FBiH, u zavisnosti od mogućnosti poslodavca.

Kolektivni ugovor su potpisali predsjedavajuća pregovaračkog tima UPFBiH/Grupacija poslodavaca za djelatnost tekstila, kože i obuće FBiH Behrija Huseinbegović i predsjednik Sindikata tekstila, kože, obuće i gume Jakub Skrobo. Ugovor stupa na snagu danom potpisivanja i primjenjivat će se godinu dana, uz mogućnost produženja.

[Kolektivni ugovor za djelatnost tekstilne, kožarsko-prerađivačke, gumarske i industrije obuće i FBiH](#)

Održana sjednica Skupštine Grupacije poslodavaca SBK pri Udruženju poslodavaca u FBiH



Sjednica Skupštine Grupacije poslodavaca Srednjobosanskog kantona pri Udruženju poslodavaca u Federaciji BiH održana je 29. oktobra 2025. godine u Travniku.



Sjednici su prisustvovali predsjednik i direktor UPFBiH Nihad Imširović i Mario Nenadić, predsjedavajuća Zajedničke komisije za ekonomske reforme i razvoj Parlamentarne skupštine BiH Ermina Salkičević-Dizdarević, sekretar Ministarstva privrede SBK Aldin Ljubunčić i djelatnik

Ministarstva Elmir Crnica kao i brojni članovi i privrednici Srednjobosanskog kantona.

Predsjednik Upravnog odbora Grupacije SBK pri UPFBiH Kemal Čolak predstavio je Izvještaj o radu Grupacije za period 2022.–2025. godine te istakao da je Grupacija aktivno djelovala na rasterećenju privrede, kroz zagovaranje smanjenja poreza i doprinosa, te na uspostavljanju

realnog modela određivanja minimalne plaće, uz obavezno smanjenje fiskalnih opterećenja. Poseban fokus pored neophodnih fiskalnih rasterećenja, stavljen je na unapređenje obrazovnog sistema, uključujući revidiranje upisa u srednje škole i nastavnih planova te uvođenje dualnog modela obrazovanja sa akcentom na učenje uz rad. Čolak je naglasio da su poslodavci u SBK kroz pripremu kadrova i praktičnu nastavu uradili više na terenu nego obrazovne institucije, te da je upravo saradnja privrede i obrazovanja ključ za stvaranje kvalitetne radne snage, te je pozvao sve prisutne da podrže aktivnosti koje provide Udruženje poslodavaca u FBiH sa menadžmentom GOPA projekta, financiranog od strane Vlade Švicarske.

Aktivnosti Grupacije bile su usmjerene i na probleme odlaska radne snage, zadržavanje kvalifikovanih kadrova, te na rješavanje pitanja putne infrastrukture, koja značajno utiče na poslovanje privrede.

Podsjetio je da je u proteklom periodu održano više od pet sjednica Ekonomsko-socijalnog vijeća SBK na kojima su predstavnici Grupacije aktivno učestvovali i delegirali teme smanjenja poreza i doprinosa, infrastrukturnih problema, nabavke sirovina, visoke cijena energije, kao i reformi obrazovnog sistema.

"Mislim da je važno da poslodavci prepoznaju značaj uključivanja u stručno obrazovanje mladih i da razumiju kako taj proces mora biti dobro organizovan. Trebamo pomoći jedni drugima, i poslodavci politici i politika poslodavcima, tek onda možemo polučiti konkretne rezultate. Zajednički moramo raditi na povećanju intelektualnog potencijala prostora jer samo to će nam omogućiti da idemo u promjene koje je neophodno provesti" kazala je predsjednica Skupštine Grupacije poslodavaca SBK pri UPFBiH Snježana Kopruner.

U Programu rada i prioritetne aktivnosti za period 2025.-2026. godine, predsjednik UO je naglasio da se prioriteti odnose na aktivno učešće Grupacije u radu ESV-a i unapređenje socijalnog dijaloga, donošenje mjera koje potiču privredni rast i olakšavaju poslovanja, smanjenje i ukidanje parafiskalnih nameta, pojednostavljenje administrativnih procedura,



iniciranje donošenja seta fiskalnih zakona kako bi se smanjili doprinosi, a povećale plaće, te stvaranje uslova za konkurentno tržište rada.

Predsjednik Udruženja poslodavaca u FBiH Nihad Imširović naglasio je da Grupacija poslodavaca SBK, uprkos okruženju koje nije stimulatívno, aktivno i uspješno djeluje i prati aktivnosti i prioritete UPFBiH, posebno one koje se odnose na fiskalne i radno-pravne reforme. Istakao je da je povećanje minimalne plaće za 2025. godinu izazvalo poremećaj na tržištu rada te da njezin rast ne bi trebao prelaziti zbrinu stopu inflacije i GDP-a. Upozorio je na činjenicu da će privredna moć biti dodatno oslabljena ulaskom Bosne i Hercegovine u zelenu tranziciju, odnosno uvođenju CBAM-a.

Predstavnici Udruženja skrenuli su pažnju na prioritete koji se također odnose i na pitanja izmjena Zakona o zdravstvenom osiguranju s ciljem smanjenja dana bolovanja na teret poslodavaca, kao i zaustavljanja prakse i izmjene propisa vezano za naknadu štete i troškova liječenja koji padaju na teret poslodavaca bez obzira da li je do povrede došlo kriviciom poslodavaca ili ne i bez obzira da li je do povrede došlo na radnom mjestu.



Prisutnima se obratila i predsjedavajuća Zajedničke komisije za ekonomske reforme i razvoj Parlamentarne skupštine BiH Ermina Salkičević-Dizdarević koja se zahvalila Udruženju na pozivu i pohvalila izuzetnu saradnju koju je ostvarila sa rukovodstvom

Udruženja, posebno na planu izmjena propisa na nivou BiH, ali i brojnih inicijativa i prijedloga koje je usaglasila sa predstavnicima Udruženja i delegirala u daljnju procedure. Pojasnila je trenutni status bh. privrede kada se radi o CBAM politikama, ali i drugim izazovima vezano za poslovanje bh. Kompanija na tržištu EU i šire, počevši od 1.1.2026. godine.

Članovi Upravnog odbora usvojili su Izvještaj o radu i Program rada Grupacije te je kroz diskusiju naglasili potrebu jačanja saradnje poslodavaca u SBK, kao i aktivnijeg uključivanja u procese donošenja odluka koje se odnose na privredu ovog kantona. Naglašeno je da je

potrebno istrajavati na mjerama za olakšanje privrede.

Članovima je predstavljen i Izvještaj o provođenju UN principa o poslovanju i ljudskim pravima i Strategije EU o društvenoj odgovornosti preduzeća u BiH u okviru projekta "Jačanje zaštite ljudskih prava u aktivnostima poslovnog sektora BiH" koji implementira Udruženje poslodavaca u FBiH i Udruženje poslodavaca RS-a, a uz finansijsku podršku Europske.



"Radi se o Projektu gdje želimo na području Bosne i Hercegovine preslikati ono što je već uobičajni standard u poslovanju u europskim i širim okvirima, primjeniti dobre prakse EU politika kada se radi o društveno -odgovornom poslovanju te smo s tim ciljem održali deset online i isto toliko edukacija u prostorijama kompanija na temu ljudskih prava u aktivnostima biznis sektora. Cilj nam je do kraja godine održati još nekoliko konferencija i okruglih stolova kako bismo našim poslodavcima, vlastima i radnicima predložili da se ubrzanije krećemo ka podizanju standarda zaštite ljudskih prava u poslovnom okruženju, jer ovo se ne odnosi samo na radnike, nego i na

poslodavce, ali predstavnike vlasti" kazao je direktor UPFBiH Mario Nenadić.

Prisutni su pohvalili rad Udruženja poslodavaca na svim nivoima vlasti i sugerisali daljnje stručno jačanje i osposobljavanje struktura Udruženja kako bi postali još kvalitetniji dio ekonomsko-socijalnog dijaloga u FBiH.

Sjednica je zaključena pozivom na daljnje zajedničko djelovanje u pravcu stvaranja povoljnijeg poslovnog ambijenta i jačanja konkurentnosti privrede Srednjobosanskog kantona, ali i viših nivoa vlasti i organiziranja u BiH.

Sastanak predstavnika UPFBiH i Direkcije za europske integracije



Na inicijativu Udruženja poslodavaca u FBiH, direktor UPFBiH Mario Nenadić i predsjednik Udruženja poslodavaca KS Suad Ećo sa saradnicama, održali su 14. oktobra 2025. godine sastanak sa pomoćnicom direktora Direkcije za europske integracije Darijom Ramljak i saradnicama.

Direktor UPFBiH Mario Nenadić istakao je da je UPFBiH reprezentativno udruženje poslodavaca i da broji više od 22.000 članica te da je, kao takvo, član Ekonomsko-socijalnog vijeća za teritoriju FBiH kao i u kantonima gdje su formirana ova vijeća. Istakao je da kroz formalno i neformalno pridruživanje Bosne i Hercegovine Europskoj uniji, poslodavce očekuju brojni izazovi, posebno u kontekstu sporog napretka i usklađivanja propisa i politika u BiH sa izazovima poslovanja bh. kompanija na tržištu EU. Posebno je naglasio predstojeće izazove i probleme koji će se javiti od 1.1.2026. godine, a vezano za primjenu CBAM mehanizma, problem ograničenog boravka prevoznika iz BiH u zemljama EU, probleme vezano za spor process digitalizacije i drugo. Kazao je da je neophodno jačanje ekonomsko-socijalnog dijaloga, kao i uključivanje u projekte koje će olakšati EU integracije domaćeg privrednog sektora.

Direktor Nenadić naglasio je i važnost saradnje poslodavaca i vlasti u BiH po pitanjima uključivanja poslodavaca u rad nadležnih komitetima EU i drugim operativnim i stručnim tijelima Europske komisije, koja već u ovoj fazi mogu biti od izuzetne koristi na podršci olakšanom poslovanju naših kompanija na tržištu EU i priprema za EU integracije, a posebno na planu privlačenja i realizacije određenih projekata koje može realizirati civilni sektor u

procesu priprema i samih EU integracija.

Predsjednik Udruženja poslodavaca Kantona Sarajevo Suad Ećo naglasio je važnost podrške Direkcije za europske integracije u pripremnim aktivnostima za EU integracije, ali također već u ovoj fazi, postoji prostor za podršku olakšavanju poslovanja i unaprijeđenje zaštite domaćih privrednika pri poslovanju u EU.

Predstavnice Direkcije Darija Ramljak i Radmila Urta, ukazale su na važnost uključivanja nevladinog sektora, posebno UPFBiH, u proces europskih integracija te informisale prisutne o narednim koracima koje Direkcija planira u cilju jačanja njihove uloge i doprinosa ovom procesu. Svakako se i na Udruženje poslodavaca u FBiH računa u predstojećim procesima mapiranja pregovora, tehničke podrške i veće uključenosti civilnog sektora u okviru EU integracija kao reprezentativnim socijalnim partnerom po ovim pitanjima.

Ovaj sastanak predstavlja nastavak i intenziviranje saradnje između UPFBiH i Direkcije za europske integracije s ciljem što efikasnijeg i inkluzivnijeg provođenja procesa EU integracija u Bosni i Hercegovini.

UPFBiH učestvovalo na Sajamu zapošljavanja "Gledaj sebi posla"



U Sarajevu je 06. i 07. oktobra 2025. godine održan Sajam zapošljavanja "Gledaj sebi posla" s ciljem povezivanja poslodavaca sa onima koji traže svoj prvi posao ili žele napraviti promjenu u karijeri.

Organizator Sajma je Federalno ministarstvo rada i socijalne politike, uz podršku Federalnog zavoda za zapošljavanje, Fonda za profesionalnu rehabilitaciju i zapošljavanje osoba s invaliditetom i UN Women Bosne i Hercegovine.

Premijer Vlade FBiH Nermin Nikšić je tokom otvaranja istaknuo važnost praktičnih efekata ovakvih susreta.

"Ona narodna uzrečica "gledaj sebi posla" danas postaje stvarnost. Poslodavci imaju priliku da ponude konkretne poslove, a oni koji traže zaposlenje mogu direktno razgovarati s njima. Prošli sajam je već pokazao rezultate jer su neki ljudi zahvaljujući tim susretima danas zaposleni ili su prošli prekvalifikaciju", naveo je Nikšić.



Udruženje poslodavaca u FBiH je tokom Sajma imalo svoj štand na kojem je pružalo informacije o aktivnostima UPFBiH, a u okviru sajamskih aktivnosti održani su i paneli koji su se fokusirali na ključne izazove tržišta rada. Na dva panela učestvovali su i predstavnici Udruženja poslodavaca u FBiH. Sekretar UPFBiH

Mersiha Jusić učestvovala je na panelu „Novi zakoni i izmjene zakona – rad, posredovanje i zapošljavanje stranaca” na kojem je razgovarano o nedostatku radne snage, preprekama u zapošljavanju, kao i preporukama za kvalitetnija zakonska rješenja, dok je predsjednik Udruženja poslodavaca KS Suhad Ećo učestvovao na panelu „Budućnost rada u BiH – globalni trendovi i lokalne šanse” čiji je bio fokus uloga domaćih i međunarodnih organizacija i institucija u kreiranju održivih politika zapošljavanja, kako globalni trendovi utiču na BiH i gdje su šanse za mlade i povratnike.



Udruženje poslodavaca u FBiH učestvovalo u Socijalnom danu – prilika za povezivanje mladih i privrede




Udruženje poslodavaca u Federaciji BiH učestvovalo je u ovogodišnjem Socijalnom danu, koji je održan 24. oktobra 2025. godine u organizaciji Asocijacije srednjoškolaca u BiH. Tim povodom u prostorijama Udruženja boravili su učenici Treće gimnazije Sarajevo i Druge gimnazije Sarajevo, koji su imali priliku da jedan radni dan provedu u stvarnom poslovnom okruženju.

Tokom dana, učenici su se upoznali s načinom rada Udruženja, aktivnostima koje se provode, te s procesima koji doprinose unapređenju poslovnog ambijenta u Federaciji BiH.

„Drago nam je što smo bili dio ove vrijedne inicijative koja mladima omogućava da iz prve ruke upoznaju poslovni svijet. Ovakvih i sličnim projekata treba više jer vjerujemo da pomažu učenicima da razviju osjećaj za radne procese i lakše prepoznaju svoje profesionalne afinitete,” poručio je direktor UPFBiH Mario Nenadić.

Socijalni dan predstavlja jedinstven vid praktičnog iskustva za srednjoškolce iz više od 30 lokalnih zajednica u BiH. Tokom tog dana učenici volontiraju na radnim mjestima, dok poslodavci uplaćuju simboličnu dnevnicu u Fond Socijalnog dana, iz kojeg se kasnije finansiraju srednjoškolski projekti i inicijative.

Nova članica UPFBiH - Raiffeisen BANK d.d. Bosna i Hercegovina



Raiffeisen BANK d.d. Bosna i Hercegovina je osnovana 1992. godine, a danas je jedna od vodećih banaka u Bosni i Hercegovini. Više od 1.200 zaposlenika Banke putem 92 poslovnice pruža usluge za oko 430.000 klijenata.

Mnogobrojna, kako domaća, tako i međunarodna priznanja, kao što su

nagrade renomiranih magazina Global Finance, Euromoney te The Banker, potvrda su uspješnog poslovanja Banke.

Investiranje u nove tehnologije, iskusno i educirano osoblje koje se stalno usavršava, naglasak na individualnom pristupu klijentu, te uvođenje novih, savremenih proizvoda i usluga predstavljaju glavne faktore konkurentnosti Raiffeisen banke na bosanskohercegovačkom tržištu.

Više o Banci pročitajte [OVDJE](#).

Nova članica UPFBiH - Udruženje za rane Bosne i Hercegovine

Udruženje za rane Bosne i Hercegovine je nevladina organizacija posvećena unapređenju prevencije, liječenja i edukacije u oblasti zbrinjavanja rana. Sa sjedištem u Sarajevu, na adresi Bolnička 25, Udruženje djeluje kao centralna tačka za zdravstvene profesionalce, pacijente i sve zainteresirane za najnovije pristupe u tretmanu rana. Misija Udruženja je pružiti podršku kroz edukaciju, istraživanje i implementaciju savremenih metoda u zbrinjavanju rana, s ciljem poboljšanja kvaliteta života pacijenata i smanjenja komplikacija povezanih s ranama. Kroz organizaciju seminara, radionica i stručnih skupova, Udruženje nastoji kontinuirano educirati medicinsko osoblje i podizati svijest javnosti o važnosti pravilnog tretmana rana.

Nova članica UPFBiH - MC-Stella



MC-Stella se prvi put pojavljuje u julu 1998. godine i aktivira djelatnost elektroinstalaterskih radova za kućne i industrijske instalacije jake i slabe struje, a ubrzo se otvara specijalizirana prodavnica

elektromaterijala po sistemu od sijalice do trafostanice. Već za par godina izrasta među vodeće firme Unsko-sanskog kantona na polju elektroenergetike i elektroizgradnje a posebno se istakla u gradnji visokonaponskih mreža 20 kV-nog nivoa i trafostanica 10(20)0.4 kV snage do 1000 kVA.

Pored niza poslova u elektroenergetici MC Stella je u novije vrijeme proširila djelatnost i na polje automatike od njene primjene u zgradama i nadzornim sistemima do automatizacije industrijskih procesa. Preduzeće se temelji na 100 % privatnom kapitalu, a sjedište se nalazi u Velikoj Kladuši. Korektnost u poslovanju proizvela je veliko povjerenje kod dobavljača, investitora i poslovnih partnera. Danas je MC Stella zahvaljujući stalnom usavršavanju i ulaganju u opremu i kadrove osposobljena za obavljanje vrlo složenih zadataka iz okvira svoje djelatnosti.

MC Stella d.o.o. nudi širok spektar usluga, proizvoda i rješenja pri čemu se posebno izdvajaju djelatnosti na polju elektronenergetike i automatizacije. Uz neprestani sopstveni razvoj, profesionalno usavršavanje te nastojanje za efikasnom, funkcionalnom i sigurnom upotrebom tehnike te praćenje i primjenu modernih tehnologija MC Stella zauzima sve značajnije mjesto na tržištu nudeći optimalna i savremena rješenja za upotrebu i upravljanje energijom. Nastup na tržištu rukovođen je prvenstveno interesom kupaca i partnera, zbog čega posebnu pažnju posvećuju kavalitetu, pouzdanosti i konkurentnosti naših proizvoda i usluga.

Više o kompaniji pročitajte [OVDJE](#).

Nova članica UPFBiH - Schema

Strateško opredjeljenje d.o.o. Schema je kompanija za zastupanje, konsalting, veleprodaju i maloprodaju repromaterijala koji se koriste u proizvodnji namještaja i građevinske stolarije na teritoriji BiH. U nastojanju da pruže obećanu kvalitetu, firma



„Schema“ saradnju bazira sa poznatim firmama iz Njemačke te preuzima zastupništvo za najpoznatije brendove u njihovoj branši kao što su „Bea“, „Kleiberit“, „Sata“, „Homanit“, „Soudal“ te postaje distributer proizvoda navedenih firmi u BiH. Sjedište kompanije doo Schema je u Ključu, dok je druga poslovnica u Sarajevu.

Više o kompaniji pročitajte [OVDJE](#).

Nova članica UPFBiH - "Avita" Ključ - Hotel Ključ



AVITA d.o.o. iz Ključa je registrovana kompanija koja djeluje u sektoru turizma i ugostiteljstva, sa posebnim fokusom na hotelske usluge. Glavna djelatnost kompanije AVITA d.o.o. je pružanje usluga smještaja i ugostiteljstva. Prepoznatljiva je po upravljanju objektom Hotel Ključ, koji je postao važan lokalni centar za turiste i poslovne goste. Hotel

nudi moderno opremljene sobe, recepcijske usluge i restoran, čime doprinosi razvoju turizma u Unsko-sanskom kantonu.

Nova članica UPFBiH - Ključka Kula "Ključ" d.o.o.



Ključka KULA d.o.o. iz Ključa je prepoznatljivo ime u oblasti ugostiteljstva i turizma na području Unsko-sanskog kantona. Ova firma je u potpunosti posvećena razvoju turističke ponude grada Ključa te predstavlja pozitivan primjer lokalnog preduzetništva koje aktivno doprinosi promociji kulturnih i prirodnih ljepota regije.

Kompanija djeluje u sektoru ugostiteljstva i turizma, nudeći širok spektar usluga koji uključuju:

- Restoranske usluge kroz objekat "Pizzerija Bambi", koji je postao popularno okupljalište kako za lokalno stanovništvo tako i za posjetioce iz drugih krajeva;
- Turistički smještaj i iznajmljivanje soba, čime zadovoljava potrebe turista koji posjećuju Ključ i okolinu;
- Organizaciju kulturnih i zabavnih događaja, posebno tokom prazničnih perioda kao što je doček Nove godine, čime dodatno doprinosi atraktivnosti destinacije.

Kompanija teži stalnom unapređenju usluga i širenju kapaciteta kako bi odgovorila na rastuće potrebe tržišta. U fokusu su kvalitet, autentičnost i iskustvo gosta, što je čini posebno atraktivnom za domaće i strane turiste.



UDRUŽENJE POSLODAVACA

UDRUŽENJE POSLODAVACA U FBiH
MARŠALA TITA 6, 71 000 SARAJEVO

TEL: 00 387 33 552 460

FAX: 00 387 33 552 461

MAIL: info@upfbih.ba

WEB: www.upfbih.ba